

Na osnovu člana 53. stav 5. člana 83. i 84., člana 234. stav 2. i člana 237. stav 1. Zakona o zdravstvenoj zaštiti ("Službene novine Federacije BiH", broj 46/10 i 75/13), člana 6. Zakona o ustanovama ("Službeni list R BiH", broj: 6/92, 8/93 i 13/94), člana 38. tačka 2 i člana 110 stav 1. Statuta općine Gornji Vakuf – Uskoplje («Službeni glasnik općine Gornji Vakuf – Uskoplje», br. 1/01 i 3/05) i člana 89. Poslovnika o radu Općinskog vijeća Gornji Vakuf – Uskoplje («Službeni glasnik općine Gornji Vakuf – Uskoplje» br. 7/13), Općinsko vijeće Gornji Vakuf – Uskoplje na svojoj 6. redovnoj sjednici održanoj 29.07.2021. godine, donijelo je,

**O D L U K U**  
**o preuzimanju prava osnivača i usklađivanju**  
**organizacije i poslovanja Javne ustanove Dom**  
**zdravlja Gornji Vakuf-Uskoplje**

**I – UVODNE ODREDBE**

**Član 1.**  
**(Osnivač)**

(1) Općinsko vijeće Gornji Vakuf-Uskoplje (u daljem tekstu: Osnivač) je osnivač Javne ustanove Dom zdravlja Gornji Vakuf-Uskoplje (u daljem tekstu: Dom zdravlja) koja je osnovana u cilju pružanja primarne zdravstvene zaštite stanovništvu na području Općine Gornji Vakuf-Uskoplje.

(2) Ovom Odlukom vrši se preuzimanje prava osnivača i usklađivanje organizacije i poslovanja ustanove Dom zdravlja Gornji Vakuf-Uskoplje sa odredbama Zakona o zdravstvenoj zaštiti ("Službene novine Federacije BiH", broj 46/10 i 75/13), (u daljnjem tekstu: Federalni zakon).

**II - NAZIV, SJEDIŠTE, STATUS, DJELATNOST I OVLAŠTENJA U PRAVNOM PROMETU**

**Član 2.**  
**(Naziv i sjedište)**

(1) Dom zdravlja iz člana 1. ove Odluke nastavlja sa radom i poslovanjem pod nazivom Javna ustanova Dom zdravlja Gornji Vakuf-Uskoplje (u daljem tekstu: Dom zdravlja).  
Skraćeni naziv Javne ustanove Dom zdravlja Gornji Vakuf-Uskoplje je: JU Dom zdravlja Gornji Vakuf-Uskoplje.

(2) Sjedište Doma zdravlja je u Gornjem Vakufu-Uskoplju, ul. Bistrička cesta bb.

**Član 3.**  
**(Status)**

(1) Dom zdravlja je javna ustanova u državnoj svojini, ima status pravnog lica i upisan je u registar Općinskog suda u Travniku.

(2) Dom zdravlja ima svoj pečat čiji se oblik i sadržina utvrđuju Statutom.

**Član 4.**  
**(Djelatnost)**

(1) Djelatnost Doma zdravlja obuhvata:

- djelatnost porodične medicine;
- djelatnost zdravstvene zaštite djece;
- djelatnost polivalentnih patronažnih sestara u zajednici;

- higijensko – epidemiološku zaštitu;
- hitnu medicinsku pomoć;
- zaštitu reproduktivnog zdravlja žena;
- zdravstvenu zaštitu kod nespecifičnih i specifičnih plućnih oboljenja;
- fizikalnu i mentalnu rehabilitaciju u zajednici;
- zdravstvenu zaštitu radnika, kao dio medicine rada;
- zubozdravstvenu zaštitu;
- laboratorijsku i radiološku dijagnostiku
- praćenje zdravstvenog stanja stanovnika i provođenje mjera za zaštitu i unapređenje zdravlja stanovnika;
- prevenciju, liječenje i rehabilitaciju bolesti i povreda;
- otkrivanje i suzbijanje faktora rizika masovnih nezaraznih bolesti;
- specifičnu preventivnu zdravstvenu zaštitu mladih, naročito u osnovnim i srednjim školama na svom području;
- imunizaciju protiv zaraznih bolesti;
- liječenje i rehabilitaciju u kući;
- palijativnu njegu.

(2) Dom zdravlja je dužan učestvovati u osiguranju uvjeta za pružanje specijalističko-konsultativne djelatnosti i djelatnosti javnog zdravstva na svom području, a u skladu sa ugovorom sa Zavodom zdravstvenog osiguranja Kantona.

(3) U skladu sa Odlukom o klasifikaciji djelatnosti Bosne i Hercegovine („Službeni glasnik Bosne i Hercegovine“, broj; 47/10) djelatnost Doma zdravlja obuhvata slijedeće razrede:

- 86.21 Djelatnost opće medicinske prakse,
- 86.22 Djelatnost specijalističke medicinske prakse,
- 86.23 Djelatnost stomatološke prakse,
- 86.90 Ostale djelatnosti zdravstvene zaštite.

(3) Dom zdravlja može obavljati i druge neupisane djelatnosti koje služe obavljanju djelatnosti upisane u sudski registar ako se one u manjem obimu ili uobičajeno obavljaju uz upisane djelatnosti.

#### **Član 5. (Ovlaštenja u pravnom prometu)**

(1) U pravnom prometu sa trećim licima Dom zdravlja istupa u svoje ime i za svoj račun, bez ograničenja u okviru registrovane djelatnosti.

### **III–AKTI DOMA ZDRAVLJA, STATUSNE PROMJENE I PROMJENA DJELATNOSTI**

#### **Član 6. (Akti Doma zdravlja)**

(1) Akti Doma zdravlja su Statut i drugi opći akti u skladu sa Zakonom.

(2) Statut je osnovni opći akt Doma zdravlja koji donosi Upravni odbor uz obaveznu saglasnost Osnivača.

(3) Statutom Doma zdravlja se uređuju osnovna pitanja vezana za rad Doma zdravlja, i to:

- a) naziv i sjedište Osnivača,
- b) naziv i sjedište Doma zdravlja,
- c) djelatnost Doma zdravlja,

- d) izvori i način obezbjeđenja sredstava za rad Doma zdravlja,
- e) način raspolaganja viškom prihoda nad rashodima i način na koji se pokriva višak rashoda nad приходima Doma zdravlja,
- f) prava i obaveze Osnivača u pogledu obavljanja djelatnosti za koje je Dom zdravlja osnovan,
- g) međusobna prava i obaveze Doma zdravlja i Osnivača,
- h) imenovanje direktora i organa upravljanja Doma zdravlja,
- i) stručna tijela i mandat članova stručnih tijela Doma zdravlja, način izbora i finansiranje,
- j) druga pitanja od značaja za rad Doma zdravlja.

#### **Član 7. (Statusne promjene i promjene djelatnosti)**

(1) Dom zdravlja ne može vršiti statusne promjene, promjene naziva, sjedišta i druge promjene utvrđene Zakonom i ovom Odlukom, bez saglasnosti Osnivača.

(2) Promjenu ili proširenje djelatnosti Doma zdravlja ne može izvršiti bez saglasnosti ministra zdravstva Srednjobosanskog kantona (u daljem tekstu Ministra) koja se izdaje u formi rješenja a na način i postupku propisanom Federalnim zakonom.

### **IV - PRAVA, OBAVEZE I ODGOVORNOSTI DOMA ZDRAVLJA**

#### **Član 8. (Prava i obaveze Doma zdravlja)**

Danom stupanja na snagu ove Odluke Dom zdravlja zadržava objekte i opremu na korištenje, zaposlenike, odnosno sva prava i obaveze Javne ustanove Dom zdravlja Gornji Vakuf- Uskoplje.

#### **Član 9. (Sredstva rada)**

Sredstva za rad i razvoj Dom zdravlja ostvaruje:

- a) ugovorom sa Zavodom zdravstvenog osiguranja Federacije BiH odnosno Srednjobosanskog kantona,
- b) ugovorom sa Ministarstvom zdravstva Srednjobosanskog kantona
- c) ugovorom na osnovu proširenog i dobrovoljnog zdravstvenog osiguranja,
- d) iz sredstava Osnivača u skladu sa ovom Odlukom,
- e) iz sredstava budžeta Federacije, Kantona i Općine,
- f) iz učešća korisnika zdravstvene zaštite u pokriću dijela ili ukupnih troškova zdravstvene zaštite,
- g) slobodnom prodajom usluga na tržištu,
- h) iz drugih izvora na način i pod uvjetima utvrđenim zakonom i Statutom Doma zdravlja.

#### **Član 10. (Prihodi i rashodi)**

Način raspolaganja viškom prihoda nad rashodima i način na koji se pokriva višak rashoda nad приходima regulisat će se Statutom Doma zdravlja.

#### **Član 11. (Odgovornost za obaveze)**

(1) Dom zdravlja odgovara za svoje obaveze svim sredstvima kojima raspolaže.

(2) Osnivač supsidijarno odgovara za obaveze Doma zdravlja do visine osnivačkih sredstava sa kojima preuzima osnivačka prava u odnosu na Dom zdravlja.

(3) Osnivačka sredstva u vrijeme donošenja ove Odluke su revidirana vrijednost kapitala iz bilansa stanja za 2020. godinu.

## **Član 12.** **(Odgovornost i obaveze prema osnivaču)**

(1) Dom zdravlja je odgovoran Osnivaču za rezultate svog rada i djelovanja u svim oblastima za koje je nadležan.

2) Obaveze Doma zdravlja prema Osnivaču su:

- a) da pribavi saglasnost Osnivača kod svih statusnih promjena Doma zdravlja,
- b) da pribavi saglasnost Osnivača kod donošenja Statuta i izmjena i dopuna Statuta Doma zdravlja,
- c) da najmanje jednom godišnje podnosi Osnivaču izvještaj o radu i finansijskom poslovanju Doma zdravlja,
- d) druge obaveze utvrđene zakonom.

## **V - ORGAN UPRAVLJANJA I RUKOVOĐENJA I STRUČNA TIJELA DOMA ZDRAVLJA**

### **Član 13.** **(Upravni odbor)**

(1) Organ upravljanja u Domu zdravlja je Upravni odbor.

(2) Djelokrug Upravnog odbora je:

- a) donošenje Statuta Doma zdravlja,
- b) imenovanje i razrješenje direktora odnosno v.d. direktora Doma zdravlja,
- c) utvrđivanje planova rada i razvoja Doma zdravlja,
- d) utvrđivanje godišnjeg programa rada,
- e) donošenje finansijskog plana i usvajanje godišnjeg obračuna,
- f) donošenje općih akata o unutrašnjem uređenju i sistematizaciji poslova i drugih općih akata u skladu sa Zakonom i Statutom Doma zdravlja,
- g) odlučivanje o svim pitanjima obavljanja djelatnosti radi kojih je zdravstvena ustanova osnovana, ako zakonom nije određeno da o određenim pitanjima odlučuje drugi organ Doma zdravlja,
- h) usmjeravanje, kontrolisanje i ocjena rada direktora,
- i) rješavanje svih pitanja odnosa sa Osnivačem,
- j) odlučivanje o korištenju sredstava preko iznosa utvrđenog Statutom Doma zdravlja,
- k) odgovaranje Osnivaču za rezultate rada Doma zdravlja,
- l) odlučivanje o prigovoru zaposlenika na rješenje kojim je drugi organ određen Statutom Doma zdravlja, odlučio o pravu, obavezi i odgovornosti zaposlenika iz radnog odnosa,
- m) podnošenje osnivaču najmanje jedanput godišnje izvještaja o poslovanju Doma zdravlja,
- n) obavlja i druge poslove u skladu sa zakonom i Statutom Doma zdravlja.

(3) Upravni odbor ima tri člana i čine ga predstavnici:

- Osnivača, 1 član,
- stručnih radnika Doma zdravlja, 1 član,
- Ministarstva zdravstva Srednjobosanskog kantona, 1 član.

(4) Predsjednika i članove upravnog odbora Doma zdravlja imenuje i razrješava Općinsko vijeće na prijedlog Općinskog načelnika.

(5) Mandat predsjednika i članova Upravnog odbora traje četiri godine i mogu biti ponovo imenovani.

(6) Bliže kriterije za imenovanje i način izbora u upravni odbor Doma zdravlja utvrđuje Općinsko vijeće na prijedlog Općinskog načelnika.

(7) Mjesečnu naknadu za rad predsjednika i članova upravnog odbora Doma zdravlja utvrđuje Općinsko vijeće na prijedlog Općinskog načelnika, a naknada se isplaćuje iz sredstava Doma zdravlja.

#### **Član 14. (Direktor)**

(1) Organ rukovođenja u Domu zdravlja je direktor, koji organizira i vodi poslovanje, predstavlja i zastupa Dom zdravlja i odgovoran je za zakonitost rada Doma zdravlja.

(2) Direktor se imenuje na osnovu javnog oglasa u skladu sa Zakonom.

(3) Direktora imenuje upravni odbor Doma zdravlja, uz prethodnu saglasnost Općinskog načelnika.

(4) Direktor Doma zdravlja mora imati završen medicinski, stomatološki, farmaceutski fakultet ili farmaceutsko-biokemijski fakultet, najmanje pet godina radnog iskustva u struci, imati znanje o zdravstvenom menadžmentu koje dokazuje certifikatom o obavljenoj edukaciji iz zdravstvenog menadžmenta, i to sva tri nivoa edukacije u skladu s propisima o kontinuiranoj profesionalnoj edukaciji iz zdravstvenog menadžmenta, odnosno završenoj specijalizaciji iz zdravstvenog menadžmenta ili završenom postdiplomskom studiju iz zdravstvenog menadžmenta, te ispunjavati druge uvjete propisane aktom o osnivanju, odnosno statutom.

Direktor Doma zdravlja mora imati i jednu od specijalizacija iz okvira djelatnosti Doma zdravlja, ili završen medicinski fakultet sa specijalizacijom iz socijalne medicine, organizacije i ekonomike zdravstva a ukoliko se u Domu zdravlja pruža specijalističko-konzultativna zdravstvena zaštita ravnatelj može biti i osoba sa specijalizacijom iz oblasti specijalističko-konzultativne zdravstvene zaštite koja se pruža u Domu zdravlja.

(5) Mandat direktora traje četiri godine.

(6) Po isteku mandata ista osoba može, ponovo biti imenovana za direktora, ali najviše za još jedan mandatni period.

(7) Ako direktor nije imenovan u skladu sa zakonom u roku od 60 dana od isteka konkursnog roka, kao i drugim slučajevima prestanka mandata direktora, odluku o postavljenju vršioca dužnost direktora donosi upravni odbor Doma zdravlja najduže na period do šest mjeseci.

(8) Direktor može biti razriješen i prije isteka mandata na koji je imenovan, u slučajevima predviđenim Federalnim zakonom i Statutom Doma zdravlja.

#### **Član 15. (Stručna tijela)**

Dom zdravlja može imati stručna i druga tijela i komisije, u skladu sa Zakonom i Statutom Doma zdravlja.

**Član 16.**  
**(Prava zaposlenika)**

Zaposlenici Doma zdravlja ostvaruju svoja prava u skladu sa Zakonom, Kolektivnim ugovorom i Statutom Doma zdravlja.

**VI – DRUŠTVENA BRIGA ZA ZDRAVLJE NA NIVOU OPĆINE**

**Član 17.**  
**(Društvena briga za zdravlje)**

(1) Društvena briga za zdravlje na nivou Općine Gornji Vakuf-Uskoplje obuhvata ocjenjivanje rada Doma zdravlja i kvaliteta zdravstvenih usluga, kao i osiguranje finansijskih sredstava za unapređenje rada Doma zdravlja i kvaliteta zdravstvenih usluga u skladu sa potrebama stanovništva i mogućnostima Općine.

(2) Društvena briga iz stava (1) ovog člana ostvaruje se na način da Općina osniva Zdravstveni savjet na nivou Općine koji planira i evaluira provođenje zdravstvene zaštite na području Općine, daje mišljenje na planove i programe zaštite na području Općine, predlaže mjere za poboljšanje dostupnosti i kvaliteta zdravstvene zaštite, prati povrede prava pacijenata i poduzima mjere za unapređenje tih prava na području Općine Gornji Vakuf-Uskoplje, te obavlja i druge poslove i zadatke u skladu sa propisima o pravima, obavezama i odgovornostima pacijenata.

(3) Zdravstveni savjet Općine imenuje posebnom odlukom Općinsko vijeće na prijedlog Općinskog načelnika. Odlukom o imenovanju Zdravstvenog savjeta, pored sastava, utvrđuje se mandat i način finansiranja Zdravstvenog savjeta.

**VII – PRELAZNE I ZAVRŠNE ODREDBE**

**Član 18.**  
**(Trajanje)**

(1) Vrijeme trajanja Doma zdravlja je neograničeno i traje dok osnivač cijeni da postoji javni interes u oblasti za koju je osnovan.

(2) Dom zdravlja može prestati odlukom Osnivača ukoliko ne postoji potreba za obavljanjem djelatnosti Doma zdravlja, te u drugim slučajevima predviđenim zakonom.

**Član 19.**  
**(Obaveza donošenja Statuta)**

Upravni odbor je obavezan da, u roku od dva mjeseca od dana stupanja na snagu ove Odluke, uskladi Statut Doma zdravlja sa Zakonom i ovom Odlukom.

**Član 20.**  
**(Upis u sudski registar)**

Stupanjem na snagu ove Odluke Dom zdravlja je obavezan izvršiti promjene upisa u sudskom registru kod nadležnog suda u Travniku, u skladu sa Zakonom i ovom Odlukom.

**Član 21.**  
**(Objavljivanje i stupanje na snagu)**

(1) Ova Odluka stupa na snagu narednog dana od dana objavljivanja u "Službenom glasniku Općine Gornji Vakuf-Uskoplje".

(2) Stupanjem na snagu ove Odluke stavlja se van snage Odluka o osnivanju JU Dom zdravlja Gornji Vakuf-Uskoplje ("Službeni glasnik Općine Gornji Vakuf -Uskoplje", broj 5/03 i 1/04).

Broj:01-02.1-\_\_\_/21  
Gornji Vakuf-Uskoplje,  
29.07.2021.godine

Predsjednik  
Općinskog vijeća  
Goran Batinić, mag.nov.